

www.BibleForChildren.org


Mateo 1




Isabel ña sugta killa wigsawa ungug kaura, Taita
Diuska ikuti anjil Gabrielta kachamurka María suti
sipaspagma. Pai warmi, Galilea alpamanda Nazaret
suti puiblupi kaugsakurka. Mana kari rigsiska karka,
ña José suti kariwa kasarangapa. José karkami David
suti atun mandagpa wambrapa wambra.



Anjilka nirka: —María, mana
mancharikui. Kamta, Taita Dios iapa
suma kuiaiwami kawá. Kunauraka,
unguringapami kangí. Nispaka, sug
kari wambrami iukangapa kangí.
Paitaka sutichinkangimi
Jesús. Diospa ñawipi, paika
iapa atun niskami kanga.
Tukuimanda mas atun Taita Diospa
wambrami suti kanga.



Atun Taita Diuska, paita
kuangapami ka, ñugpamanda
taita Davidsina mandangapa;
chasallata, Jakobpa
wambrapa wambrakunata
tukui punchakuna
mandakungapaglla. Paipa
mandaika, mana imaurapas
puchukaringapa kanchu.



—Nukaka, manara kusaiug kanichu—
María anjilta ainirka—. Chimanda,
¿imasatak chasa tukuwanga?

Chiura, anjilka ainirka:

—Santu Ispiritumi kam
kikinma uraikumunga.

Tukuimanda mas atun
Taita Diospa iapa
iachaiwa puiusinami
kamta
kilpagsamunga.



Chimanda wawita
tiagsamugka, tukuipi mas
allimi kangapa ka. Taita
Diuspa wambrami suti
kangapa ka.



Chi punchakunamandaka, Mariaka
mana unaila rirka Judea sachuku sug
puiblu tiaskama. Chima chaiagrispaka,
Zakariaspa wasima
iaikuspa, Isabelta
nirka: —Puangi. Chasa
niskata Isabel uiaura,
paipa wawitaka wigsa
ukupi sinchi
kuiurigsamurka.



Chiura Isabelta, Santu Ispíritu
iaikuspa iuiachigsamurka. Chiwanka,
sinchi rimaiwa kasami nirka: —Kamka,
tukui warmikunamandapas
mas iapa kuiaskami kangi.
Kamba wigsapi tiaska
wawitapasmi
chasallata iapa
kuiaska ka.



Kasami tukugsamurka,
Jesucristo tiagsamungapa
kaura. Paipa mama María,
Josewa kasarangapa karka.
Paikuna manara sugllapi
kaugsagpi, Mariaka
Santu
Ispiritumandami
wigsitawa ungug ña
karka.



Paipa kusa tukunga Joseka
kawarka, paipa warmi ña
wambrawa ungug kagta. Pai,
alli runa kaspá, mana
munarka, sugkunapa ñawipi
pingaiachingapa. Nispa
iuiarirka, paimanda
pakalla sitaspa
anchuringapa.



Chasa iuiakunkama, atun Taita Diuspa sug anjilka,
Joseta muskui ukupi kawaripa, nirka: —Davidpa
wawakunapa wawa José, mana
mancharikui. Kamba warmi tukunga
Mariata kamba wasima kai.



Paika, Santu Ispiritumandami ungug ka. Kari
wambrami iukangapa ka. Paitaka sutichinkangimi
Jesús. Paimi, paipa alpamanda kagkunata
pandariskakunata
pasinsiaspa, kispichingapa ka.



José, ña rigcharispaka, atun Taita Diuspa anjil imasa
niskasina rurarka. Mariata paipa wasima warmitasina
kaiarka. Chasa kaiaspapas, mana sugllapi
tukurkakuna, willaska kari wambra
tiagsamunkama. Ña tiagsamuura,
paita Jesús sutichirka.



Chi punchakuna Augusto suti Romapi iaia mandag,
paipa alpakuna suiu tukui kaugsanakuskapagma
kacharka, paikuna maituku
kaugsanakuskata
tapuchigringapa.



Tukuikunami iukarkakuna, ñugpata taitakuna
kaugsaskama ringa, chipi paikuna maituku
kaugsanakuska
willagringapa.



Chiwanka, Joseta chaiarka, Galilea alpa i
Nazaret puiblumanda llugsispa, Judea alpama
ringapa. Belén suti
puibluma rirka, paipa
ñugpamanda
taita David
chipi



tiagsamuska kagmanda.



María, Josewa kasarangapa kaspá, paiwa rirka.
María, wigsitawami ungug karka.



Belenma chaiagriuraka,
tiagsamungapa puncha
chaiarka.



Mana tarirkakuna, maikan wasipipas samaringapa, iapa
junda runakuna kagmanda. Chimanda, animalkunapa
kaugsadiru ukupi iaikurkakuna.



Chi ukupika, Mariaka kari wambrami iukagsamurka.
Paitaka linsu pitiwa maituspa, animalkuna mikudiru
batiasinapi sirichirka.



Belén puiblu kuchu kuchu, sug runakuna tuta
ubijakunata kawag pakaridur tiarkakuna.



Diulpillakar atun Taita Diuspa sug anjil, Diuspa
suma punchaiachiwa paikunata kawarigsamurka.
Chasa kawariura, paikuna iapa
mancharirkakuna.



Anjilka nirkakunata: —Mana mancharinakuichi. Suma Willaimi apamukuni. Chi Willaita uiaspaka, tukui runakunami iapa kuntintaringapa kankuna.



Kunaurami David tiagsamuska puiblupi kamkunata
kispichig tiagsamurka. Taita Dios agllaska iaia
Cristomi ka.



Kasa kawaspami paita rigsinkangichi: animalkuna
mikudiru batiasinapi linsuwa maituska wawita
sirikuskatami tarigrinkangichi.



Kasa kawaspami paita rigsinkangichi:
animalkuna mikudiru batiasinapi linsuwa
maituska wawita sirikuskatami



tarigrinkangichi.



Samug anjilkuna paikunapa suma luarma kutiura,
chi ubijakunata kawagkunaka paipura rimarirkakuna,
kasa nispa: —Akushi Belenma. Atun Taita Dios imasa
nukanchita anjilkunawa willangapa kacha
muskata kawagrisunchi.



Chiuralla, Belén puibluma kalpalla
rirkakuna. Chaiagripaka, Mariata,
Joseta i wawita animal mikudiru
batiasinapi sirikuskatami
tarigrirkakuna.



Chasa kawas paka, tukui ima
anjilkuna chi wawitamanda niskata
tukuikunatami willai aparkakuna.



Judea alpamanda
Belén puiblupimi
Jesús tiagsamurka.
Chi alpapi
kaugsanakuskata
mandag,

Herodes suti karka. Chiurakuna
magu suti istrillakunata
iachaikug taitakunaka, indi
llugsidirunigmanda Jerusalén
puibluma chaiagsamurkakuna.



Chipika tapunakurka:
—Judiukunapa atun
mandag ña
tiagsamuska,
¿maipitak ka?
Istrilla pai

tiagsamuska kawachigtami
indi llugsidirupi kawarkanchi.
Chimandami samurkanchi,
paita kunguringapa.



Chasa uiangallawa Herodeska,
pakalla magukunata kaiaspa,
allilla tapuchirka:

—¿Imauramandatak chi
istrilla llugsiskata
kawarkangichi?—. Tukui
tapuchispaka, nirka—
Belenma riichi. Chipika, chi
wawamanda allilla tapungichi.
Paita tarispaka,
willawagsamungichi,
nukapas
rispa, paita



kungurigringapa.



Chasa uiaspa, chi magukunaka chimanda llugsirkakuna.
Chiura chi istrilla ñugpa kawaskaka, ikuti kawarispá,
ñugparka. Belén puibluma
chaiagrispa, chi wawa
kaskapi saiarigrirka.



Chi wasi ukuma iaikugrispaka, wawata mama
Mariawanta tarigrirkakuna. Kungurispaka, wawata
muchar kakuna. Ima apamuskata
paskaspaka, paita kararkakuna:
kuri, suma asna insinsu,
mira kupal.



Chiuramanda, magukunata muskui ukupi willai
tukurkakuna, Herodespagma mana kutingapa.
Chimanda, pai kikinkunapagma
sug ñambita kutirkakuna.



Magukuna ña riskauramanda,
atun Taita Diuspa anjilka,
muskui ukupi kawarispá,
Joseta kasami nirka:
—Atarii. Wawata
mamandiwanta, Ejipto
suti alpama mitikuichi.
Chi alpapi chisiagriichi,
nuka ikuti kamta
willankama.

Herodesmi
wawata wañuchingapa
maskachingapa ka.





Chi tutalla Joseka,
atarispa, wawata
mamandiwanta pusaspa,
Ejiptoma mitikurkakuna.
Chi alpapika
kaugsagrirkakuna,
Herodes wañunkama.





Chasami atun Taita Dios,
paipa Ispirituwa
rimagwa ñugpata
willaskasina tukugsamurka.
Kasami ñugpamandata
willaraiarka: "Ejipto
alpamandami nukapa
wambrata kaiarkani".





Herodeska iuiarigsamurka:
"Nuka imasa niskasina,
magukuna mana
willawagsamurkakuna".
Chiwanka, iapa rabiawa
tukugsamurka.



Nispaka, suldadukunata
Belén puibluma chi suiu
kaugsanakus-kapagma
kacharka, tukui manara iskai
wataiug kari wambrakunata
wañuchingapa.



Istrilla imaura kawariskata
magukunata allilla
tapuchiskawa iuiarispasi
chasa kacharka.



Ña Herodes
wañuskauramanda, atun Taita
Diuspa anjilka, Ejipto alpama
rispa, ikuti Joseta muskui
ukupi kawarigrirka, kasa
nispa: — Atarii. Wawata
mamandiwanta
pusaspa, Israel alpama
kutii. Wawata wañu
chingapa

munagkuna, ñami
wañurkakuna.



Chaiagsamuspaka,
iacharkakuna, Arkelao
suti Herodespa
wambra, Judea
alpallapita
mandag



kagta. Chasa
iachaspaka, mancharirka chi alpapi
kaugsagringapa. Nispa, muskui ukupi paita
willai tukuspa, Galilea suti alpama rirkakuna.



Chima chaiagrispaka,
Nazaret suti puiblupi
kaugsai kallarirkakuna.
Chasami Santu
Ispirituwa
ñugpata



willaraiaskasina
tukugsamurka. Kasami willaraiarka:
"Paika, nazareno sutimi kangapa ka".



Taita Dius, kai
alpamanda tukui
runakunata ña iapa kuiaspa, kikinpa
suglla wambratami kachamurka;
chasaka, paimanda tukui suma
iuiagkuna, puchukaringataka,
mana puchukaridiru kaugsaita
iukangapakuna.



Romanos 3:23

Tukuikunami pandarinchi. Chimandaka, Taita Dios atun sumaiachiskamanda iapa karupisinami karkanchi.

Romanos 6:23

Pandari spa ruragka, wañuitami chaskí. Ikuti Taita Dioska, nukanchipa Iai Jesucristowa mana puchukaridiru suma kaugsaitami kará.

Hebreokunata 9:27

Imasami tukui runakunata chaiá, sug biajilla wañungapa; nispaka, Diospa ñawi ladu justisiai tukugringapa:



Efesopi 2:8,9

Taita Dios suma kuiagmandami, kamkuna, paiwa suma iuiaripa, kispichiska tukurkangichi. Mana kispirirkangichichu kam kikinkunapa iuiaillawa. Taita Dios kikin karaskallawmi kispichii tukurkangichi. Kam kikinkuna allilla ruraskamanda mana kispirirkangichichu; chasaka, ñi pipas mana atuniachiripa ningapa: "Nuka kikinllami kispirirkani".

Romanos 10:9,10

Kamkunapa simiwa willaspami iukangichi, Jesús nukanchipa iaia kagta ninga. Kamkunapa iuiaiwami iukangichi suma iuiaringa, pai wañuskata, Taita Dios kaugsachiska kagta. Chasa iuiaiwa kagmandami kispichii tukungapa kangichi. Kamkunapa iuiaiwa Jesucristowa suma iuiariskamandami mana pandarig niraiangichi. Simiwa Jesucristomanda willagmandami kispichiitukungapa kangichi.



Juan 3:16,17 Taita Dios, kai alpamanda tukui runakunata ña iapa kuiaspa, kikinpa suglla wambratami kachamurka; chasaka, paimanda tukui suma iuiagkuna, puchukaringataka, mana puchukaridiru kaugsaita iukangapakuna. Taita Dios, kikinpa wambrata kai alpama mana kachamurka, kaimanda runakunata justisiai rurangapa. Nukanchita kispichingapami paita kachamurka.

1 Juan 5:11-13 Kasami Taita Dios willá: mana puchukaridiru suma kaugsaitami nukanchita karamuska ka. Chi kaugsaita paipa wambrawami karamuska ka. Chiwa, maikanpas Taita Diospa wambrawa suglla iuiyai chariraiag, chi kaugsaitapasmi iuká. Ikuti maikanpas mana Taita Diospa wambrawa suglla iuiyai chariraiagpika, manima chi kaugsaita iukanchu. Nuka willaskata kachanakuikichitami, kamkuna kasa iachangapa: kamkuna Taita Diospa wambrawa suma iuiarigkuna, mana puchukaridiru suma kaugsaitami iukangichi.



Mateo 1-2; Lucas 1-2

Storyline by: Edward D. Hughes

Illustrated by: M. Maillot
and Alastair Paterson

Adapted by: E. Frischbutter; Sarah S.

Inga Bible (inb) © 2009, Wycliffe Bible Translators,
Inc. All rights reserved.

<https://live.bible.is/bible/INBWBT/MAT/1>

©2024 Bible for Children, Inc.

www.M1914.org

www.bibleforchildren.org

